

Landskeppni í eðlisfræði 2019

Úrslitakeppni

9. mars kl. 09:00-12:00

Leyfileg hjálpargögn: Reiknivél sem geymir ekki texta.

Keppnin samanstendur af 3 dæmum. Athugaðu hvort þú hafir fengið öll dæmin.

Öll dæmin 3 vega jafnt og ekki verður dregið frá fyrir röng svör. Liðunum í hverju dæmi er ekki endilega raðað eftir erfiðleikastigi. Það má alltaf leysa seinni liði þó fyrri liðir hafi ekki verið leystir.

Skrifaðu lausnir þínar snyrtilega á lausnablöð sem þú færð afhent og merktu þau vel.

Tekið verður tillit til útreikninga við yfirferð á dæmum.

Góður frágangur hefur jákvæð áhrif!

Tafla yfir þekkta fasta

Nafn	Tákn	Gildi
Hraði ljóss í tómarúmi	c	$3,00 \cdot 10^8 \text{ m/s}$
Þyngdarhröðun við yfirborð jarðarinnar	g	$9,82 \text{ m/s}^2$
Massi rafeindar	m_e	$9,11 \cdot 10^{-31} \text{ kg}$
Rafsvörunarstuðull tómarúms	ϵ_0	$8,85 \cdot 10^{-12} \text{ C}^2 \text{ s}^2 / (\text{m}^3 \text{ kg})$
Frumhleðslan	e	$1,602 \cdot 10^{-19} \text{ C}$
Þyngdarfastinn	G	$6,67 \cdot 10^{-11} \text{ m}^3 / (\text{kg s}^2)$
Fasti Plancks	h	$6,63 \cdot 10^{-34} \text{ J s}$




1 Klassískur líftími vetnisatómsins

Árið 1785 setti Charles-Augustin de Coulomb fram eftirfarandi lögmál um rafkraftinn milli tveggja hlaðinna agna með hleðslu q_1 og q_2 í fjarlægð r frá hvorri annarri:

$$F_k = k \frac{q_1 q_2}{r^2}$$

þar sem $k = 8,99 \cdot 10^9 \text{ Nm}^2/\text{C}^2$ er fasti sem nefnist fasti Coulombs. Samkvæmt líkani Bohrs ferðast rafeindir í kringum kjarnann á hringlaga brautum. Í þessu dæmi munum við skoða vetnisatómið. Lítum á eina rafeind á braut um eina róteind. Við munum sýna fram á að þetta klassíska líkan Bohrs geti ekki staðist. Rafeindin hefur hleðslu $-e = -1,602 \cdot 10^{-19} \text{ C}$ og massa $m_e = 9,11 \cdot 10^{-31} \text{ kg}$ á meðan róteindin hefur hleðslu $+e = 1,602 \cdot 10^{-19} \text{ C}$ og massa $m_p = 1,67 \cdot 10^{-27} \text{ kg}$.



Mynd 1: Líkan Bohrs af vetnisatóminu.

- (a) (0.5 stig) Sýnið fyrst að áhrifin vegna þyngdarkraftsins

$$F_G = G \frac{m_e m_p}{r^2}, \quad G = 6,67 \cdot 10^{-11} \text{ Nm}^2/\text{kg}^2$$

milli rafeindarinnar og róteindarinnar séu hverfandi í samanburði við rafkraftinn, það er, finnið $\frac{F_G}{F_k}$.

- (b) (1 stig) Rafeindin er á hringhreyfingu um róteindina og verður því fyrir miðsóknarkrafti. Finnið hraða rafeindarinnar á braut sinni um róteindina sem fall af r og þekktum föstum.
- (c) (0.2 stig) Umritið niðurstöðuna í liðnum á undan til þess að finna r sem fall af þekktu föstum og v .
- (d) (0.3 stig) Finnið miðsóknarhröðunina, $a_{\text{mið}}$, einungis sem fall af þekktu föstum og v .
- (e) (0.3 stig) Finnið miðsóknarhröðunina, $a_{\text{mið}}$, einungis sem fall af þekktu föstum og r .

Rafhleðsla sem verður fyrir hröðun geislar frá sér orku með affinu:

$$P = \frac{dE}{dt} = -\frac{2}{3} \frac{kq^2 a^2}{c^3}$$

þar sem k er fasti Coulombs, q er hleðsla agnarinnar, $c = 3,00 \cdot 10^8$ m/s er ljóshraðinn og a er hröðun agnarinnar. Þessi jafna nefnist Larmor formúlan. Samkvæmt Larmor formúlunni tapar rafeindin því orku vegna hröðunarinnar af völdum miðsóknarkraftsins.

- (f) **(2.5 stig)** Látum ΔE tákna breytinguna í orku rafeindarinnar eftir að hún hefur ferðast eina umferð í kringum vetniskjarnann og látum K tákna hreyfiorku hennar. Sýnið að:

$$\frac{|\Delta E|}{K} = \frac{8\pi}{3} \left(\frac{v}{c} \right)^3$$

- (g) **(0.2 stig)** Ritið hægri hlið Larmor formúlunnar:

$$P = \frac{dE}{dt} = -\frac{2}{3} \frac{ke^2 a^2}{c^3}$$

einungis sem fall af r með því að nota niðurstöðuna í (e)-lið.

- (h) **(1 stig)** Finnið heildarorku rafeindarinnar einungis sem fall af þekkту föstunum og r .

- (i) **(1 stig)** Reiknið $\frac{dE}{dt}$ með því að diffra niðurstöðuna í liðnum á undan með tilliti til t .

[Ábending: Þið megið nota keðjuregluna $\frac{dE}{dt} = \frac{dE}{dr} \frac{dr}{dt}$]

- (j) **(1 stig)** Nota má niðurstöðurnar úr liðum (g) og (i) til þess að fá diffurjöfnu á eftirfarandi formi:


$$\frac{dr}{dt} = -\gamma \frac{1}{r^2}$$

þar sem γ er fasti sem er fall af föstunum k, e, m_e og c . Ákvarðið γ .


- (k) **(2 stig)** Geisli vetnisatómsins er $a_0 = 5,29 \cdot 10^{-11}$ m og geisli kjarnans er $b_0 = 0,878 \cdot 10^{-15}$ m. Leysið diffurjöfnuna með því að beita aðskilnaði breytistærða og finnið tímann τ sem það tekur rafeindina að falla inn í kjarnann.

2 Ögn sem rennur innan á sívaling

Lítilli ögn með massa m er komið fyrir á innra borði sívalnings sem er holur að innan og hefur massa M og geisla R . Sívalningurinn er kyrrstæður í byrjun. Ögninni er sleppt úr kyrrstöðu í hæð R líkt og á mynd 2. Gerum ráð fyrir því að enginn núningskraftur verki milli agnarinnar og sívalningsins. Látum stærð núningskraftinn milli sívalningsins og yfirborðsins sem hann hvílir á vera táknaðan með $F_{\text{nún}}$. Gerum ráð fyrir því að sívalningurinn rúlli án þess að renna. Látum θ vera hornið á milli lóðlínu gegnum miðju sívalningsins og línu frá miðju sívalningsins að ögninni eins og sést á mynd 3. Við táknum stærð þverkraftsins á ögnina með P og stærð þverkraftsins á sívalninginn með P_1 .



Mynd 2: Þegar ögninni er sleppt úr hæð R .



Mynd 3: Þegar ögnin hefur runnið niður dálítinn spöl.

- (0.2 stig)** Finnið heildarorku kerfisins einmitt þegar ögninni er sleppt.
- (1 stig)** Látum A tákna hröðun sívalningsins. Skrifðu niður kraftajöfnu sívalningsins þegar ögnin myndar hornið θ miðað við lóðlínu. Finnið A sem fall af $m, M, R, P, P_1, F_{\text{nún}}, \theta$ og þekktum föstum.
- (1 stig)** Látum α tákna hornhröðun sívalningsins. Skrifðu niður vægisjöfnu um ás gegnum miðju sívalningsins þegar ögnin myndar hornið θ miðað við lóðlínu. Finnið α sem fall af $m, M, R, P, P_1, F_{\text{nún}}, \theta$ og þekktum föstum.
- (1 stig)** Látum a_x tákna hröðun agnarinnar samsíða hreyfingarstefnu massamiðju sívalningsins og látum a_y tákna hröðun agnarinnar hornrétt á hreyfingarstefnu massamiðju sívalningsins. Skrifðu niður kraftajöfnu fyrir ögnina og finnið bæði a_x og a_y sem fall af $m, M, R, P, P_1, F_{\text{nún}}, \theta$ og þekktum föstum.
- (1 stig)** Tengid saman niðurstöðurnar í liðunum þrem hér á undan og sýnið að:

$$2MA = P \sin \theta = ma_x$$

- (0.8 stig)** Látum u tákna hraða massamiðju sívalningsins og látum v tákna hraða agnarinnar. Finnið heildarorku kerfisins þegar ögnin er í lægstu stöðu sem fall af m, M, R, v, u og þekktum föstum.
- (1 stig)** Nýtið ykkur niðurstöðuna í lið (e) til að sýna að í lægstu stöðu gildi um hraðana u og v að:

$$2Mu = mv$$

- (2 stig)** Ákvarðið hraðana u og v þegar ögnin er í lægstu stöðu einungis sem fall af m, M, R og g .
- (2 stig)** Finnið þverkraftinn á ögnina frá sívalningnum þegar ögnin er í lægstu stöðu.

3 Að sigla upp í vindinn


Svanhildur siglingargyðja hefur fengið nóg af kaldri veðráttu Íslands og ætlar að sigla til suðrænni landa. Við munum í þessu dæmi skoða einfalt líkan af seglskútu Svanhildar. Gerum ráð fyrir að seglskútan hafi eðlismassa ρ_b og sé hálfsváningsskel með innri radíus r og ytri radíus R og af lengd L líkt og á mynd 5.

- (a) (1 stig) Hver er stærsti farmur, m , sem að Svanhildur getur flutt með sér án þess að skútan sökkvi ef ekki er tekið tillit til massa masturs og segls?


Í viðmiðunarkerfi þar sem sjórinn er kyrr látum við \vec{w} tákna hraða vindsins og \vec{v} tákna hraða skútunnar. Stærðir hraðanna táknnum við með w og v . Dragkrafturinn sem verkar á skútuna á móti hreyfingu hennar er gefinn með formúlunni:

$$F_D = \frac{1}{2} \rho_s C_D A v^2,$$

þar sem ρ_s er eðlismassi sjósins, C_D er dragstuðullinn sem er háður seigju vökvans og lögun skútunnar og A er flatarmál ofanvarpsmyndar þess hluta skútunnar sem er í vatninu á plan sem er hornrétt á stefnu skútunnar. Látum S tákna flatarmál seglsins og hunsum sveigju seglsins vegna vindsins. Skútan ferðast einungis í þá átt sem stefni hennar snýr í, það er að segja, hún ferðast ekkert til hliðanna.



Mynd 4: Skútan hennar Svanhildar



Mynd 5: Þverskurður af skútunni.


- (b) (0.5 stig) Látum eðlismassa loftsins vera ρ_l og gerum ráð fyrir að seglið sé hornrétt á vindinn. Sýnið, með því að nota lögmál Bernoullis, að seglkrafturinn, F_S , sem verkar hornrétt á seglið sé gefinn með:

$$F_S = \frac{1}{2} \rho_l S (w - v)^2$$


- (c) (2 stig) Í fyrstu fær Svanhildur góðan meðbyr og siglir beint með vindi. Finnið hámarkshraða skútunnar, v_{\max} , þegar skútan siglir beint með vindi með seglið hornrétt í vindinn.

[Ábending: Skútan siglir með hámarkshraða þegar að heildarkrafturinn sem verkar á hana er núll.]


Skjótt skipast veður. Nú fer vindurinn að blása beint á móti stefnu bátsins líkt og á mynd 6. En Svanhildur deyr ekki ráðalaus. Hún byrjar á því að snúa skútu sinni um θ gráður miðað við stefnu vindsins líkt og á mynd 7. Hún snýr síðan segli sínu þannig að seglið myndi hornið α miðað við vindáttina og hornið β miðað við stefnu bátsins líkt og á mynd 8. Takið eftir að þá er $\theta = \alpha + \beta$.



Mynd 6: Skútu siglt beint á móti vindi.



Mynd 7: Skútu snúð um horn θ miðað við vind.



Mynd 8: Segli snúð um horn α miðað við vind.

- (d) **(0.2 stig)** Finnið þann þátt af hraða vindsins, w_{\perp} , sem er hornréttur á seglið þegar seglinu er snúð um horn α miðað við mótvindinn.
- (e) **(0.3 stig)** Finnið þann þátt af hraða skútunnar, v_{\perp} , sem er hornréttur á seglið þegar skútunni er snúð um horn θ miðað við mótvindinn og seglinu er snúð um horn α miðað við mótvindinn.
- (f) **(1.5 stig)** Finnið þann þátt seglkraftsins sem er samsíða stefnu skútunnar þegar afstaða skútu og segls miðað við vind er eins og á mynd 8.

[Ábending: Skoðið afstæðan hraða vindsins hornrétt á seglið miðað við hraða bátsins hornrétt á seglið.]

- (g) **(2.5 stig)** Sýnið að hámarkshraði seglskútunnar á móti vindi þegar skútan myndar horn θ miðað við stefnu vindsins og segl hennar myndar horn $\beta < \theta$ miðað við stefnu bátsins (sjá mynd 8) sé gefinn með:

$$v(\theta, \beta) = \frac{w \cos(\theta) \sin(\theta - \beta) \sqrt{\sin \beta}}{(\sin \beta)^{3/2} + \sqrt{\frac{\rho_s C_D A}{\rho_l S}}}$$

- (h) **(1 stig)** Sýnið að fyrir fast β þá sé besta hornið, θ , þannig að hámarkshraði seglskútunnar á móti vindi verði sem mestur, gefinn með:

$$\theta = \frac{\beta}{2} + \frac{\pi}{4}$$

[Ábending: Hornafallareglan: $\cos(x + y) = \cos(x) \cos(y) - \sin(x) \sin(y)$ gæti komið að gagni.]

- (i) **(1 stig)** Nú stagvendir Svanhildur skútu sinni upp í vindinn (þ.e. hún siglir í síkksakk á móti vindinum) og er vitaskuld búin að reikna út allar þessar niðurstöður í hausnum. Með mið af því, snýr hún segli sínu miðað við stefnu bátsins þannig að $\beta = 20^\circ$ eins og á mynd 8. Hversu marga daga er Svanhildur þá að sigla til Grænhöfðaeyja sem eru í 5460 km fjarlægð ef hún siglir á móti vindi með sem mestum hraða alla leiðina? Eðlismassi sjósins er 1020 kg/m^3 , eðlismassi loftsins er $1,23 \text{ kg/m}^3$, hraði vindsins er 17 m/s , dragstuðull bátsins er 0.04 , flatarmál ofanvarpsmyndar bátsins á plan sem er hornrétt stefnu hans er $0,500 \text{ m}^2$ og flatarmál seglsins er $50,0 \text{ m}^2$.